

石  
柏  
山  
房  
詩  
存

序

於時寒谷日短重關雪深羈禽失羣危葉脫樹余忝忝居  
返照養疴獨居思事披閱彌苦昏眊晁錯從髦期間故得  
自口傳蕭繹置左右讀書不妨目疾則有聲同變徵愴甚  
哀絃淒戾之音如咽隣家之遂存歿之感悅過黃公之爐  
精靈可呼紙墨欲語乃我亡友同年生趙君介山之遺集

也夫才士多窮文章憎達豔稱溫李半世飄蕭寒數島郊  
一官拓落羅隱終秀才之號方干追及第之魂才命相妨  
古今一概未有半生坎壈忽登黃榜之巍科十載高華終  
鬱青霞之奇氣已遭逢之極盛仍時命之堪哀如我介山  
者誠古詩人未見之例焉方其乾蔭早傾楹書初授呼貧  
共語有母誰將題糕能賦於十齡負米已逾夫百里迨夫

車偕計吏船號孝廉擘楓亭之荔支攀漢南之楊柳泛櫂  
武夷之曲題詩崔顥之樓曉角清笳破帆孤騎中酒阻風  
之滋味殘羹冷炙之悲辛天上匏瓜王粲登樓之恨表中  
春菟常何作奏之愁未免生花筆乾依蓮幕冷加以春關  
待放秋駕淹留券慣租驢巢同旅燕果長安之不易信來  
日之大難幾幾乎北郭履穿東方米盡此楚游聞游二草

所由作爲勞者之歌也繼而緇塵踏徧竟染柳衣黑刼焚  
餘忽開蓉鏡名傳三策香冠百花

九陛旬臚期霖雨之良佐

丙辰臚傳日  
詩有文楷嘉名期雅正爲霖渴

仁廟御製

望副求  
賢之句初元

授璽得忠孝之狀頭淮陰本國士無雙李揆乃中朝第一  
遂握九天之龍節遠過萬里之瀛洲入關猶認棄繻論蜀

豈徒乘傳酹酒蛟魚之背鍼辨三更宣威麟麟之衣集成  
一品百靈風雨紅燈見而天后扶舟千隊弓刀紫帽趨而  
名王負弩於是雲藍染翰銀管濡毫玉冊鐫

恩禮成互古未臣之地弓衣繡句吟到中華以外之天倭  
國購穎士之文章雞林誦香山之詩句讀槎上存稿一冊  
其遇可謂榮矣其志可謂壯矣而乃屬國初歸已嗟銜恤

承明未厭遽作監司宦游纔駐夫雁門函問竟同於鵬舍  
嘻異矣使其命原貧薄何爲畀以大魁如其才合騰騫何  
又奪其中壽一場富貴倏如春夢之婆兩卷珠璣唱出秋  
墳之鬼如風輪之起止如日及之榮枯磊落當歌誰爲拔  
劍而斫地蒼穹何意吾將呵壁而問天信乎賦命之獨奇  
而造物之不可測已嘗合其詩觀之始則泉明飢驅魯公

乞米關河羈旅不無危苦之詞風月登臨大有悲涼之作  
卽至卷阿賡唱行邁光華類皆清不取腴麗而有則蓋義  
心不離乎苦調而古愁無間於歡區天地商聲雜以羽聲  
之慷慨菰蘆窮士終同秋士之幽憂言爲心聲於斯益信  
然介山艱難奉母極纏綿乎孝思飄泊依人復峻嶒乎傲  
骨王沂公無心溫飽陸敬輿不負生平聞其歿於官署時



至貧無以殮是則趙清獻之在日琴鶴相隨盧懷慎之初  
亡鹽豉而已始終清節出處完人卽無一編亦足千古

承

瀛

論交杵臼契極苔岑同詠霓裳官聯蓬島永憶看花之

侶重尋落葉之篇

集中有和余  
落葉諸作

詩卷長留猥待徐陵而作

序波瀾莫二翻教敬禮以定文難從泉路以論心幾類  
臣之躅足嗟乎鍾期長逝敢重彈海上之琴季子歸來待

親掛隴頭之劍

道光九年己丑季秋年嫻愚弟帥承瀛謹題

石柏山房詩存目錄

卷首

經進詩

卷一

礫存集

卷二

于京集

卷三

楚游草  
閩游草

卷四

遄征集

卷五

槎上存稿

卷六

獨秀草堂存稿

卷七

木天近錄

卷八

石柏山房詩存卷之首

翰林院修撰臣趙文楷恭譔

嘉慶九年

駕幸翰林院禮成獻頌十六章

謹序

昔揚雄長楊賦云藉翰林爲主人子墨爲客卿以  
風韋昭曰翰筆也李善以爲文翰之多若林也唐

翰林院本內供奉之所而特以詞臣書詔於其間  
其地在銀臺之北自北翰林無學士之名又置東  
翰林於金鑾殿視草則有臺每草制則具衣冠據  
臺而書挑鎧起草九制一揮亦極儒臣之榮矣由  
宋迄元並重斯職明正統間詔建翰林院於長安  
左門外玉河西岸是鑾坡祕省已在掖垣之外矣

宋明以來祕書史館皆傳巡幸若院署列於禁旁  
則臣寮之公廨非敢望乘輿之及也我

高宗純皇帝於甲子之年

幸翰林院書稽古論思集賢清祕二額以顏其堂

賜古今圖書集成一部

錫宴賦詩便蕃獎賚而羣臣之謳思



威德者垂六十年我

皇上孝思浹宙躬奉天經凡

純皇帝經行典禮罔不率由而天下雍雍熙熙三省邢教

悉皆殄滅無遺四方底平文教興起至於嘉慶九

年歲次甲子亦依舊事

幸院署凡

賜額惠書分韻賦詩宴賞諸臣皆如乾隆九年之舊可

謂盛矣

臣維

皇上自丙辰

授

受事

高宗純皇帝三年祇承顏色一日三朝至於雞鳴問

安冒雨掖

輦誠孝之至皆爲古聖人之所難而率脩厥德徇齊敦敏  
以及天下溫溫洵洵至於海外莫不沾溉臣嘗奉  
使琉球經涉大海球之君臣兢兢行禮請

安迎

詔之餘皆再拜稽首譯通事而問臣曰

聖天子至仁極厚凡我海外悉皆蒙被惟大海浩渺不能親覲

聖人之形容惟天使教我

臣既以

聖度告之而觀其歡欣鼓舞之意知

皇上之德感之者深也且非獨其人然也維神亦然舟出五虎門四千餘里皆風清日霽忽東海風雲變

卷首  
四  
態雷雨轟擁而至舟人曰東海百神來朝

恩詔矣臣蕭衣冠挂免朝牌於帆檣之上卽時雷雨歇

止天日清明

詔至球陽風無火作雨亦應時歲則大熟球有朱薯耕  
者以爲糧臣至其處六閱月見其豐稔收者至於  
暴露球人歡聲載道以爲從前所未有此皆

皇上溥博之所及

福之至卽

德之至也由是知四海之謳思卽

天心眷顧而以

聖繼

聖纘承弗替故武功定而文教昌斯

幸院之所由也孟子曰觀於海者難爲水游於聖人之

門者難爲言

臣謹製詩十六章雖不能仰紀

聖德而由此以歌詠太平斯亦史臣之職也拜手稽首

獻曰

翼翼芸臺在城之側檻列鉤陳棟槐宇棘爰居爰

處斯文是職匪曰爲文以迪厥德

其一

維我

高宗甲子之春親總

六飛入彼北門雝雝其

德肫肫其

仁越六十年謳歌如新 其二

穆穆



天子孝思維則休德昭清貫行罔易亦越甲子維  
先聖是式東觀西垣

駕言來格 其三

習習春風颺颺

龍章簫管喤喤和鈴央央詞臣跪止以迓我

皇曰宴於堂載

錫之慶

其四

維我

天子載時養材旋乾轉坤機關闔開蠢彼頑愚潢池喧

阨

天戈一指鏡去塵埃

其五

維我

天子丕丕皇猷一振天聲風行水流凡六合以內至於

海陬莫不率俾以循以由

其六

臣奉

皇言涉彼東海波趨舟輕雙魚奮起雷雨殷殷風雲變

變曰東海之君來朝

帝旨

其七

水牌飄飄書曰免朝繫如懸苑雨散風消五日爲  
期姑米山高隸

聖人之宇滄海何遙

其八

球君迎止球民驚止海不揚波

聖人興止沍沍南冥曰鯤曰鯨

皇言如綸擁衛以經

其九

詔至球陽神人蒙福雨順風和以遂百穀厥有朱薯歲  
則三熟其樂融融冷淘粉粥

其十

海有颶風琤琤琮琮無西無東聲來自空矗立海  
水撼動魚龍莫爲之防拔木毀宮

其十一

臣之始至南風嫗煦數月於斯風無震怒遺老有  
言

帝德布濩海若天吳容容疏附 其十二

中山之王再拜稽首曰我

天子乾健坤厚浩淼波濤難親我

后我

后殊姿臣得聞否 其十三

臣謹告言

帝度溫淳其

仁如天其

知如神萬里紘紘視之若鄰外扞之君親猶內臣

其十四

王心快止王肅拜止

聖人之化罔弗屈止以敬以愛不敢云在外世守藩封

兢兢罔懈

其十五

海有瀛洲仙境離離亭以斯名榜蟠蛟螭

天子至止人物諧嬉臣作頌聲昭示來茲其十六



石柏山房詩存卷之首

石柏山房詩存卷之一

太湖趙文楷著

礫存集

余年十齡頗能執筆爲詩後以蚤失所怙幾至廢學  
然吟詠一道性好之不能輟也家貧甚而好遊故其  
爲詩非悲憤之言卽流連之什率爾成詠無復經營

雖多至千篇不足存也年來刪削再三存者祇百餘  
首語云沙之汰之瓦礫在後今之所刪而存者其果  
非瓦礫乎

詠百舌

六歲作

桃花紅未了百舌鬧春曉能作百般聲枝頭壓衆鳥

詠荷花

七歲作

一葉復一葉千枝更萬枝昨宵露雨露開徧鳳凰池

九日龍山會飲

十歲作

醉把茱萸殘黃花插滿頭龍歸一潭靜日落萬山秋  
鷺管驚棲鵲長歌和飯牛未知今日事能續古人不

作計遠游行復自止感歎而作

橐筆依人計未然淒涼猶守舊青氈自罹煩惱三千界已

覺蹉跎二十年素壁寒燈多雨夜斷雲孤雁欲霜天五湖  
煙水容吾住會翦荷衣掛釣船

題畫

綠楊陰裏白蘋洲雲影微微夕照收兩岸蘆花數聲雁滿  
江秋色一漁舟

發皖口

春水宜城渡孤舟二月天  
觴搖連夜雨帆掛一江煙  
挈榼尋邨市沽魚喚釣船  
今宵攬一醉聊用慰悽然

登廣陵城

自昔繁華地於今一再經  
有山皆錦繡無地不樓亭  
天入楚吳白江分淮海青  
高城回首煙樹遠冥冥

登金山

日暮碧雲合孤鴻海上來涼風送秋色蕭瑟滿高臺萬古  
此江水東流不可回故人棄我去懷抱向誰開

古意

美人閉華燭深坐彈瑤琴一彈未及終淚下沾衣襟團團  
素紈扇寂寂雙鴛衾飛雁從南來哀音動中林出門拜新  
月清風生遠岑姮娥定何處悵望愁雲深秋草萋以腓紅

顏良易沈嗟余守幽獨四顧誰知音

紀舊游

昔年曾值百花朝畫舫春游廿四橋燈火遙連瓜步月笙歌直接海門潮美人贈我珊瑚玦何以酬之碧玉簫今日不堪寒食節落花飛絮雨蕭蕭

采菽



清晨入中國采我國中菽葉萎根亦死采之不盈斛太息  
倚危石坐見東山麓桑扈羣啞啞飛來集喬木清風颯然  
至拂我松與竹撫茲節序換百族共清穆提筐入繩戶稗  
子歡相逐呼婦開新醕共效堂前祝紛吾守貧賤對此欣  
果腹嗟哉良艱辛何日霑微祿

夏日

楊柳陰陰傍畫衙東家燕子入西家一回午夢清如許坐  
看槐柯日未斜

登黃山

在灞山縣以山谷得名

昔賢不可作茲山名獨存  
謁來古原上將以窮泉源  
飛雨西南來蕭然灑孤邨  
千里一秋色平沙煙霧昏  
言尋涪翁堂荆棘日已繁  
林際來獨鶴巖畔愁孤猿  
憶昔論文時席

此傾壺尊如何數百載堂構成頽垣紛吾尙元素畏聞塵  
寰喧杖策來此地不覺清心魂溪流靜涓涓蘋藻亦可殮  
何時小築成偃卧青松根

游瀟嶽

天高木落溪光寒山色慘澹陰霾蟠長風萬里拂霜彩片  
片飛入青雲端我來天柱正秋曉萬壑千巖極幽渺須臾

日出天氣清二十七峯盡塵表中峯突兀高且長壁立千  
仞摩穹蒼卻疑造化苦鑄削造此絕境何茫茫路轉峯迴  
谿洞改杖策登臨未云怠東瞻泰岱西蓮華鬱結縈盤接  
滄海卻憶武皇巡幸時事經千載良難追殘碑斷碣不可  
見春入桃源花滿枝

秋夜

一陣西風報早寒  
秋來無夢到邯鄲  
可憐今夜團圓月  
多少愁人不忍看

釋言

北方有佳人閉戶泣漣洏  
借問何鬱鬱欲語還復遲  
十三學箜篌十六耽游嬉  
二十始知悔許結君子褊  
自謂奉盤匱貞心山不移  
如何毀言至遂令心差池  
人言市有虎所

惜聽者癡癡人不足惜胡乃君子疑巢居知天風穴居知  
雨濶皎日不見信去去復何辭

孤雁

孤雁來何暮哀鳴殊可傷豈無同病者零落不成行地每  
多增繳心猶切稻粱空冥難久託爲爾意徬徨

蕭園有老梅根株黯然無復生意以其礙徑議取

作薪者數矣晨起行樹下見南向一枝獨著數  
花冷香幽骨亭亭風雪之中徧視諸梅尙無一  
蓓蕾豈非剝極復生鬱而待發者耶詩以志感  
寂寞園林一樹梅枯藤纏匝卧莓苔若教縱斧芟除盡那  
得臨窗取次開天地有心憐苦節風霜無意困庸材從今  
嘖嘖爭看取莫道孤根盡死灰

春雪

昨夜大風吹海立古樹喧號老鶯泣  
天桃豔李凍不開梨花片片隨風來  
東郭先生高閉門手持書弓如鴟蹲  
一春未解窺委巷對此頓欲開清尊  
憶昔春游辭白下風雪沈沈船如馬  
一夜隨風到潤州舟人無不驚心者  
曉來報道近金山玉樓瓊闕虛無間  
空江拊手一長嘯浪花蹴起驚



容顏人生樂事過眼失  
瑤草琪花知無術  
黃昏雪盡酒亦  
消愁對寒雲轉蕭瑟

春郊晚行

二月芳郊雨乍晴  
桃花楊柳滿春城  
如今綠暗紅稀後  
惟有嘯鵲一兩聲

賦得花魂

渺渺芳魂未易描  
不關顏色與丰標  
向人何事多惆悵  
盡日無言久寂寥  
三徑曉寒迷碧蝶  
一簾春雨夢紅橋  
東風莫便句留去  
欲遣啼鶯爲我招

賦得鳥夢

古樹陰中託體輕  
倦飛贏得夢魂清  
心懸平野常求食  
身在南柯不爲名  
夜靜每隨殘月斷  
庭空時被落花驚  
都將

羽化成閑事好向烏衣隊裏行

舟行望九華山

九華何迢迢迢迢隔雲路有如衆仙人高處在煙霧朝辭  
皖公城夕與茲山遇亂峯插塵外飛鳥不敢度轉棹山之  
陽極目得真趣巒岫呈殊姿片片如繪素乃知以蓮名古  
人不予誤落日四山青江流不可駐我欲牽其華得毋山

靈怒直待秋風生憑高挹清露

曉發蕪湖風瘴大作未亭午卽抵采石

西梁山下浪重重茆屋人家半水中曉霧四圍雙峽口孤  
帆一片大江東乘風宗子今誰是捉月詩人未許同直過  
青山到牛渚依然雲淨日曛隴

謁太白祠

壁有蕭尺木畫  
四大名山圖

大江東去橫滄波江南江北青山多千盤百折到牛渚李  
侯遺廟山之阿翠螺幽深日黯澹松柏寂歷相糾摩我來  
登堂見遺像再四涕泗交滂沱公之文章真豪杰傲睨一  
世遭坎軻當時積憤爭欲殺豈料姓字隨羲娥壁間圖畫  
足所歷歲久缺落生青莎匡廬秀絕華嶽聳東有泰岱西  
岷峨是日庭空正昏黑蝙蝠飛盡蛩吟哦取火來照快所

靚恍有神物相撫訶出門月白四山靜千里露氣懸星河  
風起絕岸浪搏擊馮夷起舞魚跳梭人生斯世如旅寓百  
歲過眼能幾何長庚耿耿不可沒多少荆棘埋銅駝

雪

風急來孤雁山寒叫老鶻萬家村屋白千里暮雲黃門巷  
無人迹坊場有酒香蹇驢何處是羞澀一錢囊

雪羅漢

本是空花幻作身皎然清淨見天真竺城寶相偏宜玉漢  
殿金人解化銀直以寒心悲永刼休將冷眼看時人須臾  
寂滅成甘露洗淨三千世界塵

夜雨

薄醉愁來易空堂夜去深一燈寒驟雨萬竹亂驚禽得失

天難問蹉跎志漸沈淒涼不成寐幽意付鳴琴

水仙花

羅襪凌波不染塵宓妃漢女是前身芳魂合住湘江畔  
曉夢猶留洛水春瑤瑟寫愁緣底恨明珠解珮是何人  
九疑山遠黃初去太息無人賦感甄

春夜



寂寂院庭靜熒熒鐙火青遠風沈野柝積水亂春星濁酒  
難成醉閒門易早扃何人夜吹簫愁絕不堪聽

七月十一日午睡夢至一處石牀茶竈宛然洞天  
寂無人聲清冷殊甚余坐久之起拈筆題詩於  
壁未竟二句爲叩門者驚覺因足之成五十六  
字

門外青山四面平微風徐裊篆煙輕畫欄曉見迴峯影花  
徑秋聞落葉聲鉛筆總難酬壯志薜蘿是處寄高情儒冠  
誤我多年事合向維摩說姓名

夜

露冷碧梧院蛩吟青竹扉秋風動林壑新月少光輝桂玉  
關心事塵勞甘息機北窗涼似水檢點舊寒衣

游西風洞夜宿獅子庵

古寺雲深處，  
蘿間牧童烏。  
盤秋色外人語，  
暮煙中厨葢。  
千年石巖呼，  
半夜風颺拋。  
塵夢去禪榻，  
一鐙紅。

宿山寺夜雨

一片閒雲溪水邊，  
渚鷗汀鶴共迴環。  
晚風吹作檐前雨，  
攪破松窗一夜眠。

杏花

穠李夭桃總未工一枝牆外笑東風殘妝粉牘闌珊白薄  
醉顏多淺淡紅籬落晚寒疎雨後園林春暖澹煙中年來  
不作看花夢暫洗今朝兩眼矇

賦得培蘭分得鬟字

紺玉森森列翠鬟春來移自碧溪灣風當漸瀝宜疏雨石

選欽奇作遠山磁斗不留蚯蚓穴竹鍼時剔鴈鴝斑謝家  
子弟多輕俊忍使蕭條並蒯菅

次韻和克齋姪詠桃花

東風吹雲雲不開春雨颯颯隨風來天桃醉舞暈生頰千  
樹萬樹如瓊瑰就中千葉尤奇絕競白爭紅艷陽節紅欺  
金谷晚來霞白占瑤池春後雪詩人曉起妬花容象管蘸

墨朱絲濃學取右轄圖桃樹宛然插入雙芙蓉忽憶桃源  
春正暮欲往從之眼如霧不見當年避秦人暮雲落日山  
深處我家荒圃對春城花落花開無限情有酒不飲花笑  
我忍遣蕭蕭白髮生

和催花詩七首

綠肥紅瘦春意闌珊珊催花未幾又見落花矣青

春背我堂堂去撫今追昔是用慨然

後苑何須羯鼓催好憑詩句報寒芳林花一夜將春色齊  
向東風次第開

東風陣陣撲窗紗幽夢醒來日未斜昨夜月明霜氣重棲  
鴉驚墮白梨花

白梨紅杏小溪頭紫燕黃鸝解喚愁記得昔年寒食近落

花時節在揚州

揚州自昔擅繁華紅袖青鈿踏落花二十四橋人語散管絃齊上玉鈎斜

玉鈎斜上暮雲生行到平山一愴情不見廬陵舊太守江山猶自繞蕪城

山繞蕪城水接天桂舟蘭棹醉嬋娟如今寂寞黃昏雨靜



對楞嚴一炷煙

暮雨朝暎閱歲華春光多在野人家  
莫教酒盞零丁放報道風寒到棟花

夜宿田家

月出一丈高衆星垂纂纂驅車問田舍  
徑窄蒼耳滿犬吠松溪寒花繁竹籬短  
田父知客來傾壺春釀暖自言久不

雨苗長欲生稗縣吏正催科追呼不得緩我今苦行邁何  
時遂疎散亦知塵土容不入煙霞伴夜半鄰雞鳴神清夢  
魂斷天明登前途露下衣如澣

五日登鎮皖樓

高閣臨江雉堞懸晚風獵獵畫樓前中流簫鼓魚龍動夾  
岸帆檣雁鷺連芳草有情皆綠綺榴花無處不紅燃故園

不木上房言不  
卷一  
二  
百里今回首不醉蒲觴近四年

大觀亭待月

待月倚江樓月明江水流江流去不息今古空悠悠美人  
隔南浦余亦滯西州相思不可見腸斷木蘭舟

夜坐

落月銜檐角涼風動紵衣秋空萬籟寂夜久百蟲飛市道

交情薄躬耕心計違不堪回首憶惆悵十年非

中元夜

柳梢半掛昏黃月露冷吟蛩泣幽咽紙錢灰起微風颺古道青燐明復滅東家哭聲高震天西家嘔啞鳴管弦邱山華屋兩皆幻世事那足驚鼾眠芙蓉靨老蘆飛絮歲歲年年水東去殘星幾點月銜山寒鴉吶吶秋天曙

秋夜

萬壑樹蕭騷澄澄秋氣高疎星低曠野落月漾寒皋短句  
消長夜清歌送濁醪故人今寂寞誰復念同袍

截句

門掩庭莎午未炊澹雲隨雨過東籬蘆簾紙帳蕭蕭夢黃  
葉風多冷不知

次韻和人齋中詠

飛雨西南來秋山積蒼翠晚涼入北戶檢點寒衣笥陰晴  
尚難期世態何足悖我如燕雀謀君有鴻鵠志共茲飛鳴  
性樊籠繫其翅古來惟陶令閱世如兒戲沽酒不須辭安  
能計榮悴

復堂中秋

幾回客邸看明月每憶鄉關涕泗流  
今夕且持一尊酒明年又作五陵游  
三更爽氣連城闕萬里寒光逼斗牛  
多少朱門歌舞罷夜深重攬翠雲裘

盡日

盡日幽憂集浮生一羽輕無田自衣食  
有舌耻縱橫落日黃雲合西風白髮生  
馮公意蕭瑟彈鋏欲長征

先君子棄孤下世於今七年矣歲荒家貧喪不能  
舉權厝於西園中情志未申負罪莫追八月十  
九日爲先君子生辰感歎存歿不禁涕泗之  
橫流也

慟哭西園裏淒涼七度秋病餘皮骨在心急稻梁謀風雨  
愁雲集郊原逝水流青山白草徧何處植松楸



送人之神木

離亭春樹雨濛濛  
汝入西秦我向東  
身健始能禁命薄  
舌存無復畏途窮  
雲開華嶽驅羸馬  
月落榆關見斷鴻  
別後相思何處寄  
欲憑魂夢逐春風

春雪謠

小麥青青大麥穠  
老農白髮口含淚  
卧病經旬不敢出  
積

雪封門一尺二去年無穀衣食缺今年來牟遭凍折婦孫  
鵠面身無襦樹皮剝盡草根絕夜深鬼語茆檐下滿目青  
燐照原野天寒矮屋黑如磐飢鳥飛來啄竹瓦西隣寡婦  
寂無聲可憐窮老無兒孫

將之維揚留別諸同人

別酒頻傾醉易醒一肩行李短長亭木蘭舟上重回首十

里煙波兩岸青

宜城渡下水潺潺春草春波慘別顏  
今夜長風沙外宿半帆煙雨夢家山

江接潯陽九派來海門中斷萬山開  
客心得似潛溪水流到滄溟卻復回

五載淮揚路欲迷平山詩版舊留題  
二分明月三分酒此

後懷人又竹西

留別潘築巖 大濟

貧賤去家易關河行路難  
豈無一尊酒牢落不成歡  
三月婪春雪孤舟盡日寒  
馮煖有長鋏蕭瑟何誰彈

珍重故人意詩成無限愁

築巖有山中見憶之作

跡隨流水去心與

白雲留落日孤煙直滄江急浪浮明朝一相憶回首謝公

樓

沙岸阻風

千里關河悵別情一肩行李出春城  
小舟載得離愁重也似人心不肯行

慈親今夜對鐙花歷數行蹤客路賒  
回首綠楊剛十里月明和鷺宿圓沙

宿石牌山寺題壁

湖海頻年掛酒瓢，擔書又上木蘭橈。  
春江三月離愁重，夜雨孤篷客夢遙。  
每羨游僧無定迹，朅來蕭寺話寒宵。  
欲歌楚些江天暮，祇恐幽魂不可招。

寺祀三閭大夫

泊李陽河

渺渺清江起夕波，扁舟又泊李陽河。  
數椽破屋孤煙冷，幾

樹垂楊返照多花事已隨春去盡客愁無奈夜長何來朝  
桂席池陽下九子青青擁翠螺

舟次蕪湖重送思傳叔父之維揚

人世浮萍無定蹤他鄉惜別意重重願將尺鯉南來信好  
與歸鴻北去逢曉日舟中姑孰酒西風江上秣陵鐘天涯  
雨雪艱難徧太息吾家阮仲容

謂克齋姪時  
飄泊西秦

繁昌旅舍

旅舍無人盡日長一肩書擔一琴囊  
厨空蔬筍煩僧饋歲歉山林備盜攘  
蕭寺午風來燕雀荒城春草見牛羊  
江南自昔繁華地不道陽山在近鄉

遊繁昌慈雲寺

山色嵐光擁四圍偶來竹裏叩禪扉  
依巖結屋樓高下隔



不  
林  
山  
房  
言  
不  
卷一  
古  
樹棲雲影瘦肥千里關山勞鶴脰十年塵夢伴鶉衣爐煙  
細裊諸天靜閒煞山僧老翠微

贈繁昌廣文呂御堂

兆龍山陽人

田來才藪屬山陽絳帳春開講學堂官職不嫌秦博士科  
名原是漢賢良終期黃絹題金馬暫擁青氍得瘦羊怪底  
山城饒紫氣文星夜夜徹光芒

昔年蕊榜下遙空天路驂騮駿骨雄東陸也曾羸一第南

溟爭敢附羣公

家善甫與君同  
領戊子鄉薦

向來得路輕崔豕今日通

豕見孔融謬與賞音欣所遇獨慙樗朽異焦桐

自笑游蹤逐逝波每隨佳處輒婆娑江流東去隨潮轉山

勢西來壓郭多髀裏漸生三寸肉壺邊長送一聲歌無端

結願游姑孰北望青青是翠螺

又掉南陵一葉舟  
浪游幸得識荊州  
諸生不問皆鄒魯  
父老爭能說賈劉  
漫道廣文官最冷  
可知經義澤長留  
相逢徐訂秦淮約  
肯向郵亭一晤不

贈繁昌尉宋萼樓

訟庭人散靜無譁  
伴我清談禮數加  
東野幾曾輕簿尉  
廣平端不愧才華  
松間哦韻消長晝  
花裏攜琴放晚衙  
吏隱

無稱從古少羨君官府亦煙霞

夢友人

別爾亦已久念爾長太息中夜夢見之形淒意慘惻執手  
淚如雨但道苦相憶天風吹海水月落千林黑爾今在榆  
關我行向吳國相去千萬里山河互無極維山有豺虎維  
水有蛟蜮飢魂無羽翼竊恐多顛踣爾慎毋復留我亦住

不得相期在歲暮無勞悵離色

赭山一覽亭有懷潘築巖

楚天回首路漫漫盡日幽憂集百端  
一別故園空悵望獨來歧路歷艱難  
日沈大壑千山黑江轉孤城五月寒  
潘令閒居應有憶無人爲我報平安

登赤鑄山

卽赭山相傳爲  
千將鑄劍處

赤鑄山頭雲不開赤鑄山下聞殷雷火輪飛出驅苦霧天  
地淨洗無塵埃干將一去四千載雄劍入水雌鳴哀至今  
山石皆爛赤童然削劣無莓苔我來寓此山下寺幾欲言  
尋山上臺重陰積日忽開霽蠟屐忍復重徘徊蟻旋猿附  
乃得上忼然此身出八垓江水東流入滄海鳩茲纍爾如  
浮杯驚濤濁浪苦不定帆檣出沒紛崩頽誰能爲我鑄長

劍斷蛟蜃殲黃能川平如掌淨如練扁舟直入滄浪隈  
他鄉流滯古所歎壯歲胡乃雙鬢摧江東無田歸不得孟  
嘗平原安在哉夕陽欲落復不落羣羊躑躅穿荒萊野田  
青燐亂如火饑殍白骨看成堆

時方凶饑故云

我今不知其所往

暝色遠至橫相催欲呼涪翁與共語夜深儻有魂歸來

山谷

曾讀書山  
中有詩

宣城五日

獨倚危樓望眼醒  
輕寒微雨晝沈冥  
一春花事愁中盡  
五月鶉聲夢裏聽  
南浦離離芳草綠  
西山漠漠曉峯青  
他鄉五度蒲觴節  
自笑年來逐浪蘋

飲宣城謝廣文署中  
醉後游城南鰲峯賦  
此以贈  
相逢皖水已心傾  
偶到澄江訂舊盟  
太學共傳秦博士  
高



齋今屬謝宣城三年憶別成疇昔千里論交半死生

謝所知湖

中人如雷玉洞飲盡百壺婪尾酒醉中還作看山行  
余謙齋皆下世

幽花古樹冪長隄城郭稜稜入望低人物由來推北宋

宣州

自梅聖俞後樓臺猶自憶南齊雲留岫腳昏如墨漲湧溪  
詩人接軌

流陡似霓珍重宛陵賢地主又教鴻瓜印新泥

將歸與黃野夫別

名冠江西宜黃人  
善畫尤工山水

牢落天涯客相看淚滿襟艱難千里道憂患兩人心斯世  
誰堪託吾生恐遂沈寒燈今夜裏別酒又重斟

我去真飄泊君留亦寂寥山川迷客夢風雨暗河橋乍別  
魂猶戀相逢日未遙秦淮秋水便莫忘故人招

去宣城

鄉信遙遙百感生宛溪難爲客留行六朝遺柏曾傳信十

里澄江浪得名山色滿亭迷遠目浪花雙槳去孤城霸愁  
別恨休重歎天與歸人放晚晴

舟次蕪湖

擊楫中流破醉顏輕帆一葉渺茫間天清急柝聞孤枕月  
黑飛星入故山世路漫彈長劍缺客心多繞大刀環抱關  
不用詢名姓我與游僧祇一般

舟中不寐

坐擁單衾正二更江干岑寂動離情自從作客宵偏水直  
到歸舟夢不成桐葉雨多孤鶴警蘆花風起亂蛩吟舟人  
莫厭頻相問客子由來畏去程

晚泊銅陵

蹤跡真如逐浪萍扁舟夜泊蓼花汀三更北斗連城動六

月南風帶水腥野性祇應還澗壑壯心休更憶滄溟客中  
恨是無眠夜急柝聲聲不可聽

微雪

枕上遙聞雁過聲曙光徐上紙窗明依牆竹有蕭蕭響到  
地風餘旋旋輕十里麴塵消野徑一時寒色滿山城兒童  
莫認豐年瑞祇恐遺蝗未盡平

聽雪

蕭蕭颭颭復淒淒  
窗竹東邊澗水西  
疏韻乍添孤榻冷  
寒聲時入畫檐低  
蟹行絕岸千羣上  
雁落平沙萬箇齊  
試取瑤琴寫清響  
冷然弦索亦悽迷

送署縣令解組之會城

古巢三載見才猷  
煩劇從覘入仕優  
緹軾有儀同領郡  
緋

魚蒙賜是監州

原任無為州同

未陽得借龐從事并比爭迎郭細

候怪底山城如枳棘旌旄肯爲半年留

氣如秋肅與春溫玉鑑冰壺試比論遂使間閭無噩夢不  
教胥吏到閒門鳬來麥秀停車隴雨過花深繫馬邨耆老  
支筇談執政於今遺愛有公言

門掩都梁一炷烟訟庭人寂祇揮弦波濤入筆文辭麗鸞

鵠盤空籀隸妍幸以枯桐收爨底肯容陽鱗列尊前殷勤  
幾下南州榻不比蘇章有二天

卧轍難留曠世才驪歌一曲便相催征車猶戴來時繖醇  
酒無忘去後杯皖樹暮雲隨雪盡潛溪春水帶冰開潁川  
幾日歸黃霸五馬重瞻太守來

俗以立春晴則年穀登茲者陰雨彌旬旦來風雪



轉甚余生理日窘矣望歲之心較農更切感而  
有作以寄憂思焉

吳農最重新春卜瞻望長空苦不晴豈謂歲年逢屢旱故  
教風雨作先聲孤城積雪千山暗萬里寒雲一雁鳴爲語  
耕人莫惆悵天心到底念蒼生

卽事又作

一夜羣芳凍不芽東風引雪撲窗紗臘前已見三番白春  
淺猶開六出花未信地中埋玉馬爭看闕角走銀蛇連宵  
祇有空尊對且喜長醒閱歲華

春後書懷

一枝梅蕊弄新晴春色無端暗裏生自閱歲華難指屈每  
逢歡笑轉心驚傳書未讀荒三篋先緒中微負九京紺髮

如今都種種鄉間贏得老夫名

四海論交莫我知此身何以慰親慈事經困後方成悟計  
到違時亦自疑椎髻持家憐婦拙蓬頭對客惜兒癡空牆  
日午悲唸處望斷長空淚暗垂

除日有懷黃野夫

邈矣黃公望茲晨已歲除斯人定何處佳節每愁余貧病

艱難徧關河兩雪餘南陵三百里不見一行書

言雁

春後七日夜有羣雁飛鳴城中哀音動人淒然  
成韻余方感歎而人咸以爲鬼車譁然逐之夫  
雁水鳥也宜浮沈江湖之上乃偶經塵市驅逐  
隨之疑似獲戾亦可歎矣然昧於漸陸之占其

爲凶也不亦宜乎作信雁詩

月黑寥天星斗稀歸鴻一一背南飛  
劇憐無食憑誰訴轉以能鳴失所依  
豈是鴈鷗難共語由來鷗鳥本忘機  
江湖水闊蒹葭遠莫向塵寰覓是非

雨

小雨有生意幽齋驗物情  
隔牆初柳色欹枕得鶯聲  
潤入

青箱溼寒留白袷輕時時詢野叟麥穗已抽莖

有懷

鑪煙一炷拂窗紗坐閱楞嚴兩鬢華燕子不來深巷靜小  
簾春雨欲梨花

故人不與春俱至欲寄雙魚苦未能料得行滕過寒食落  
花風雨在南陵

山行

旅館破殘夢潏潏  
荳檐雨驅馬石徑間  
霧重不可覩兩山  
屹相向橫互如門戶  
一水貫其中懸流自太古  
卻疑何人爲毋乃巨靈斧  
當其下手時山靈怪狂侮  
禁之不可得劃然忽傾剖  
至今怪石形凜凜猶含怒  
或青如蹲犀或黑如伏虎  
或高懸如鐘或深藏如廡  
或如蛇含珠或如羊跪乳

如馬施絡轡如人曳璣珎飛泉競穿注日夜恣吞吐喧聲  
駭山谷奮迅儼強弩我行陟巖巔踳踳畏布武壁立三十  
丈欲視不得俯驀然一失足犖确掛肝腑以此恒自惕曳  
履戰其股已行至山椒因之涉溪澗險去乃得夷宛然見  
平土是時霧氣消中天日亭午北望司空山岡巒歷可數  
阡陌東西通人家隔煙浦中田禾黍茂野渚雁鳬聚桃花



千萬樹無言落邨塢山色環四圍中可容堂宇我欲解鞍  
歇非爲息勞苦竊恐東園公於茲隱農圃人生不適意齷  
齷苦貧窶安得買山錢誅茆築環堵古洞呼猿公清溪問  
漁父言尋十畝田歸作湖山主

獨飲

蕭蕭形影獨相親難得尊前自在身花事已如尋舊夢鶯

聲猶自戀殘春丁年愧我稱居子亥日憑誰乞婦人

抱朴子亥

日稱婦人者金也

典盡寒衣償酒債最憐無計是家貧

戊申夏五偕友人至龍會庵爲習靜之計

歷盡溪橋得古原蒼茫暮色欲黃昏人行積靄遙知寺路  
轉松陰忽到門夾道流泉三日雨平田煙樹一家邨山僧  
莫道長岑寂我已楞嚴取次論

庵中曉起

收拾頻年汗漫游，偶尋蕭寺得遲留。  
泉聲夜靜四時雨，山氣朝寒五月秋。  
垢面卻慙依古佛，機心漸欲狎浮鷗。  
夜來一枕滄洲夢，肯信人間萬斛愁。

晚自黃介河步至庵中宿

路轉清溪東復東，萬山圍繞梵王宮。  
浪游到處逢僧好，塵

夢何緣與佛通破霧月來青嶂外讀書人在綠陰中蒲團  
若許長攤卷細啜羅闍未厭窮

庵中題壁

深山五月信披裘夏雨淒涼氣作秋我似再眠蠶欲老誰  
言千里鵠難留隔窗竹霧濛濛溼繞屋溪泉漉漉流睡起  
不知天向夕一聲清磬上方幽

石柏山房詩存卷之一